

Naomi Arpagaus nova presidenta

La radunanza generala da la Giuventetgna Rumantscha (GiuRu) ha elegì ina giuvna da Laax sco nova presidenta da l'organisaziun tetgala da la giuventetgna.

Naomi Arpagaus ha 21 onns ed è dapi trais onns suprastanta da la GiuRu. Ella è cunzunt activa en la promoziun dal scriver, l'emprim cun las «Vuschs Giuvnas» en La Quotidiana, e dapi in onn cun la rubrica «Ils Zulprins». Naomi frequenta la Scola d'art a Berna nua ch'ella studegia intermediaziun d'art e design. Il president partent, Uolf Candrian, ha demissionà suenter trais periodas d'uffizi sco president. Il giuven da Sagogn era vegnì elegì 2015 a Turitg, a l'emprima radunanza da la GiuRu ordaifer la Rumantschia. Naomi Arpagaus è uss vegnida elegida via Zoom tar l'emprima radunanza generala en il spazi virtual. Ils giuvenils preschents davant lur visurs han vinavant elegì la Surmirana Angelica Augustin da Mon en il post d'assessura, ella remplazza Asa S. Hendry. A la sesida han ins discutà cunzunt da la structura da l'organisaziun. Cun questa chaschun han ins stgaffì «gruppas creativas» tar differentas tematicas, sco gieus, barat intercultural u contact tar autras uniuns. Persunas interessadas pon s'annunziar tar la GiuRu (www.giuru.ch). Per l'accompagnament musical ha il giuven chantatur Jonas Derungs da Laax procurà cun sia gitarra. Cun ina nova presidenta da Laax va l'uniun – che è dal rest vegnida fundada 1991 a Laax – plain schlantsch e fidanza en l'onn da giubileum.